

Nix wie weg?

Die G'schicht vum Prophet Jona

Predigt in Kurpfälzer Mundart

von Pfarrer i.R. Oskar Ackermann, Brühl/Baden

Evangelische Kirche Brühl am 15. Oktober 2017

Ihr liewe Christeleit', liewe G'mei!

D i e Chance! Die Chance in mei'm Lewe – for misch! Ä Mol de Größte sei! Soddische Träum' hod jedes von uns, - ehrlich. Wie oft kriegt mer so Chance? Vielleicht hab' ich se schon g'habt? Oder hab' ich se ausg'schlage – oder gar vermasset? Kumme donn noch mol so Chance for misch?

In der Biwwel werd uff zwee Seite in vier Kapitel verzählt, wie eener vor longer Zeit vun Gott en Ufftrag kriegt, awwer die Chance ned nutze will; er kneift un dud alles vermassel. Als Versager steht'er do. Es is die G'schicht' vum Prophet Jona. E spannende, e kuriose Erzählung, ihr Leit', e zeitlos' Lehrerzählung, die uns zeige will, wimir Mensche mit Chance in unserm Lewe umgehe, aa dene Chance, die Gott uns gewwe dud. Aa e Beispiel dodefier, wieviel Geduld de Herrgott mit uns hawwe kann - oder wie souverän un eige'llisch er handle un entscheide dud.

Viele Chance in unserm Lewe kumme jo u'verhofft un plötzlich: Batsch, do is'se, alla, mach was draus! So ging's dem Mann Jona, dem Sohn des Amitais. Wirklich wie an Blitz aus heiterem Himmel richtet Gott de Herr sei' Wort an'en: *Horch, Jona, geh hordisch mol in die groß' Stadt Ninive un du dene dort de Marsch blose; denn die sin böse, bitterböse Leit. Ich kann des ned länger leide.*

D i e Chance for de Jona?! Ha, er weeß noch ned: Ninive, wu es des eigentlich? Jona - was uff deutsch Tauwe heiße dud – lebt im judäische Bergland irdendwo in de Näh vun Jerusalem, der hod jo noch ned google kenne. Awwer er hod e mol g'hört, dass des Ninive e große Stadt is, die Hauptstadt vun dem mächtische Assyrer-Reich, irgendwo do im Zweistromland. Dass'es so u'g'fähr 1.000 km Luftlinie nördöstlich vun seiner Heimet is, ahnt'er noch ned. Es is'em awwer aa sowas vun egal. Er will des ned mache! Ich bin doch ned em Herrgott sein' Depp! Wer weiß denn schon, wie ich aus der G'schicht' werd rauskumme.

Er hod uffgepasst bei dem, was'er deheem in de Synagog' vun Gott g'hört hod. Sein Kinnerglaawe an de liewe Gott hod'er so gut wie verlore. Als Erwachsener hod'er g'merkt, dass in dere Welt Macht un Krieg, Streit un Lüg', Hass un Strof', Leid un Not herrsche. Wu bleibt do de barmherzische un liewende Gott, de Allmächtige un Gütische, der mol sich zeige un aa hart durchgreife dääd? Mer weeß jo nie, wie mer dro' is mit'em Herrgott!

Drum, so denkt sich de Jona, will ich mich do draus halte. *Ich bin ned die Tauwe, die wu nach Ninive fliege un dort die göttlich' Drohbotschaft verkündische dud.* Drum säch(g)d'er sich: *Nix wie weg!* Ned nach Oste' un nach Ninive, - nee in die annere Rischung, nach Weste – soo weit wie's überhaupt geht. *Nix wie weg, - der Herrgott soll mich aus seine Aage verliere.*

Un so rennt'er los, runner vun sei'm Bergland bis zum Mittelmeer in'd Hafestadt Jafo (was heit die Stadt Tel Aviv is). Do findt'er e Schiff, des nach Tarsis segle soll, - ganz uff de annere, de westliche Seit' vum Mittelmeer, praktisch am End de Welt, noch üwver die Stroß' vun Gibraltar raus. *Nix wie weg!*

Doch de Herrgott, der verliert den kneifende Kerl ned aus seine Aage.

Brav un oständisch zahlt de Jona sei' Fährgeld, sucht sich e schä Plätzle unner Deck un fängt o zu penne. Doch kaum hod des Schiff an Fahrt g'wunne, lässt de Herrgott en Mordssturm uffkumme. Die Matrose schreie wie wild dorchennanner: *Unsa Schiff geht in Bruch!* Jeder ruft sein' Gott o. Un sie schmeiße ihr' Ladung üwver Bord, damit s'Schiff leichter werd.

Doch von dem ganze Gedu' kriegt eener nix mit: Jona dud fescht schlofe. Awwer de Kapitän weckt'en: *He, wach uff! Du musschd aa dein' Gott o'rufe; mir brauche jetzert jede Hilf.* Do hod en Matrose' noch e Idee: *Leit, mir lose, damit mir rauskriege, weller Kerl uns die Strof ei'gebrockt hod.* So mache'ses. Un wen trifft s'Los? Bingo: Jona is de Übeltäter! Gleit' wolle'se noch mehr vun'em wisse: *Wie, wo, was, woher, warum?* Er muss Farb' bekenne: *Ich bin en Hebräer un du unsern Gott förschde, er hod jo alles g'schaffe; ich bin uff de Flucht vor mei'm Gott.* Die Matrose frooge sich: *Was mache mer mit so em Kerl? De Meeresgott will sei' Opfer hawwe!* Jona nimmt sein ganze Mut z'samme un säch(g)d: *Alla gut, packt mi' un schweiß mi' ins Meer; ich bin de Sündebock.* Doch die Schiffsleit' traue sich noch ned. Sie versuche's noch e Mol mit rudere; doch die Strömung is z'stark for se.

Do in ihrer höchste Not, sehe'se doch noch e gute Chance for sich. Sie rufe un bete zu dem Gott des Hebräers Jona: *Ach, Herr, loss uns ned verderbe, wemmer jetzert den eene Mann opfere, - un do uns des, bitte, ned o'kreide; du weest jo, was recht is.* Jona awwer bleibt stumm: koi Gebet, koi Bittle, Bettle un Jommere kummt üwver sei' Lippe.

Un so werd der Kerl im hohe' Boge' ins Meer g'schmisse. Gleit' druff is de Sturm vorbei. Die Matrose verschrecke sich; drum bringe'se Gott, dem Herrn e Opfer dar un lege e Gelübde ab als Dank for die Chance zur Rettung.

Un de Jona? Bevor der sich üwverlege konn, ob er als Nichtschwimmer wie verrügg't noch strample soll oder gleit' unnergehe will, macht's „schnapp“ un en große Fisch hod'en verschlunge'. E sage'haft' Lösung, ihr Leit! Denn Gott hod den Fisch g'schickt; denn er will den Jona jo ned aus seine' Aage verliere. Er braucht'en noch – als sei' Werkzeug, for den Ufftrag in Ninive. Die Chance for de Jona bleibt b'stehe. Warum awwer – um himmelswillen – immer noch for den Versager? Ich will's mol so sage: Gottes Wege sin unergründlich un nie klor zu erkläre. Irgendwie un irgendwann kumme'se an des Ziel, wu er im Sinn hod. Er konn jo aa uff krumme Linie grad schreiwe. Gell?

Drei Täg' un drei Nächt' is de Jona in dem Fischbauch versteckelt, wundersam g'rettet un g'schützt. Er kriegt die Zeit, um nochzudenke', sich neu zu b'sinne' un zu bete'. Wie gut, dass'er sich an viele Psalmversle erinnere konn un die zu sei'm eigene Gebet nutzt.

So dankt'er for sei' Rettung, - awwer üwver sei' Flucht vor'em Herrgott koi Silbe. Doch er will wieder gut sei mit Gott, will'em mit Dank Opfer bringe.

Gott hört's un lässt druff den Fisch Richtung Strand schwimme. Do spuckt des Riese'veih den Jona mit'em kräftische Rülpsen wieda ans Land. Und so fängt die ganz' G'schicht' wieda bei Null o(n).

Nochemol heißt Gott de Jona, in Rischung Ninive zu marschiere, die zwett' Chance for'en. Un jetzerd spurt der Kerl: Nix wie hi(n)! Long, ziemlich long is'er unnerwegs. Donn sieht'er sei' Ziel vor sich liege: Ninive, die groß' un weitflächig' Metropol' am Owverlauf vum Tigris, reich an prächtige Paläst' un Tempel. (Heit' heißt die Stadt im Norden vum Irak Mossul un is - wie mer leider wisse - vollkomme' zerstört.)

Een Tag long dud de Jona in des Ninive nei'laufe, guckt un staunt. *Dene Leit' sollschd' also im Ufftrag vun Gott de Marsch blöse?* Er bleibt stehe, plustert sich uff wie en Gickler und posaunt lauthals raus: *Leit, in verzich (40) Täg' werd Ninive unnergehe!* E Botschaft: korz, klor un knackich. Sunst sagt'er nix; awwer er will neugierich abworte', was fer groß' un g'waltich Katastroph' des sei keent.

40: es is e b'sunnere Zahl. Sie will sage, dass jetzerd e Zeit is, in der mer in sich gehe' un sich läutere' konn. 40 Jahr' ware die Kinner Israels unnerwegs in de Wüst'. Un aa de Jesus war 40 Täg' in de Wüst'. Awwer soddische Gedanke gehe am Jonas vorbei. Er dud uff des große Dunderwetter warte'.

Doch, o Wunner, er muss üwver was gonz anderes staune. De Jona kriegt Glotzaage' wie e Kuh un Ohre' wie en Elefant. Oh jeh! Sei' Worte, die Drohung, sei Bußpredisch(g)d - des wirkt! Doch annershd als er's gedenkt hod.

Jo, Worte wirke'. E g'scheit's Wort zur reschde Zeit kann viel b'wirke. Es kriegt sei' eige' Dynamik un konn viel verännere. Doch de Jona will des ned kapiere.

Die Leit vun Ninive hawwe sich die Drohworte vun dem fremme Sonderling z'Herze g'numme. Sie bibbere ned vor Ängschd, sie sage aa ned: der herg'loffene Kerl konn uns mol. Nee, sie sage sich: es is was dro an dem seine Wort'. Mir hawwe viel falsch g'macht. Jedes vun uns macht jo, was'es will. Mir lüge, betrüge, b'scheisse, e Menschelewe is nix mehr wert. Unsa Gott, der will so was ned. Drum konn's so ned bleiwe. Leit', mer welle un müsse des ännere - un zwar sofort. Mir due Buße, mir faste - alle Leit' un aa unser Viecher. Mir nemme uns d'Zeit, um üwver unsa eige' Versage' un unsa Schuld nochz'denke. Un donn fange mer wieder neu o(n). Aa der Keenich hod bei dem Gonze mitg'macht. Bußgottesdienst' hod mer abg'halte'. Ihr'n Gott hawwe se o'g'rufe': *Herr, erbarme dich! Wir welle umkehre' vun uns're böse Weg'.*

Als Gott de Herr des g'sehe' hod, war sein große Zorn vorbei. Ninive konn nei o'fange'. Die Leit' hawwe ihr' Chance g'nutzt.

A her, gibt's denn so ebbes! kummt's aus dem Jona raus, als er des alles sich o'gugge' muß. So en Zorn kriegt'er. Sein gonze Fruschd lässt'er de Herrgott spüre: *Ich hab's g'wusst, - schu dehoim, als du mer den bleede Ufftrag gewwe hoschd. Ich hab's g'wusst, drum bin in die annere Rischdung g'loffte, üwver s'Meer nach Tarsis g'flohe. Denn du konnschd dei' Wort' ned halte. Du un klore Kante? A was! Du machschd wieder uff „gnädig, barmherzig, langmütig und große Güte“. Du willschd alleweil de liewe Gott spiele. Mir longt's endgültig mit der. Nix wie weg! Nimm mei' Seel vun mer; ich will lieber tot sei' als so lewe!* Doch Gott gibt'em Jona immer noch e Chance: *Üwverleg der's mol, ob du mit die'm Zorn reschd hoschd, säch(g)d'er zu'em.*

Doch de Jona will sein Zorn weiter pflüge. Er will weiter druff warte, dass'es mit dem Ninive doch noch zur groß' Katastroph' kummt. Er baut sich owwerhalb vun de Stadt e klee Hüttle z'samme. Un do hoggt'er – mitte in de Hitz'. Dass de Herrgott donn hordisch e groß' Rizinusstaude wachse lässt, die ihm Schatte spende dud – g'schenkt; awwer es freit'en. Er dud weiter Ninive beobachte', ob sich do endlich ebbes was dud. Doch es dud sich do immer noch nix.

Dodefier awwer bei seim Rizinus, der wird nämlich vun'em kloine Wurm g'stoche un dud drum gonz hordisch verwelke'. Jona kriegt in de Mittagshitz en Sunnestich! Warum? Es war de Herrgott, der for den doppelte Stich verantwortlich war: den Wurm im Rinzinus wie den Kollaps vum Jona. Un der kann bloß noch japse': *Ich will sterwe, ich geb uff!*

Doch de barmherzige Gott gibt sein Jona ned uff. Er schwätzt weiter mit dem frustierte Kerl un lässt'en dodebei ganz tief in sei' Herz blicke: *Moin Liewer, du duschd üwwer den verdorrte Rizinus jommere. Kumm, sag mer: hoschd du den wachse losse? He? Ich war des un ich hab'en aa oi'gehe' losse. Und jetzerd, moin Liewer, horch e mol gut zu: Mehr als 120.000 Leit' wohne do unne in dem Ninive. Üwwer die kann un muß ich jommere; die dun mir leid, die hawwe sich verrannt un hawwe nimmer weiter g'wusst in ihrer Bosheit. Awwer die sin in sich gonge. Um die hab ich mich g'kümmert un hab'ne g'holfe – aus Liewe un Barmherzigkeit. Die hawwe ihr' Chance g'nutzt un führe jetzerd e gut's Lewe. Und du?*

Nirgends steht's g'schriewe, ob de Jona druff g'antwortet hod un was noch aus'em g'worre is. Es bleibt offe'. Doch aa die Gnad' un Barmherzigkeit, Geduld un Güte un die Liewe vun unserm Herrgott bleibt weiter offe'. Er dud üwwer unsa Lewe s'letzsche Wort spreche. Die Chance bleibt em Jona un aa uns allene, ihr liewe Leit!

Awwer ich meen: So ganz uff de letzsche Drücker sod'er mer's ned druff o'kumme losse. Mir kenne jetzerd scho die ausg'steckt' Hand Gottes o'nemme' un im Friede un in de Liewe Gottes lewe. De Heiland Jesus hod's uns vorg'macht.

Die G'schicht' vum Jona, ihr Leit', is uns dedewege verzählt worre, damit mer ned die gleich' Fehler mache' wie er: *Nix wie weg!* Gut, mir hawwe oft g'nug Gründ', um mit'em Herrgott zu hadere; daß mer'n ned verstehe' un viel' Frooge offe' bleiwe. Nix wie weg? Devu renne? Aus de Kärch' austrete? Wird's dodemit besser?

Nix wie weg? Nix wie hi(n)! Gott hod immer offene Arme, die uns neue Chance gewwe; - die uns uns in seiner Gnad' un Barmherzigkeit, Geduld un Güte un in unendlicher Liewe Orientierung un Halt gewwe. Grad aa donn, wemmer d'Nas' voll hawwe bei all dem Elend, de Not un de Verloge'heit in dere Welt, in der mir lewe.

De Heiland Jesus Christus hod uns deutlich g'sagt, dass'er uns Christeleit' braucht: als Licht in dere dunkle Welt, als Werkzeug' des Friedens. Sein Ufftrag an uns. Un er hod weiter g'sagt, dass mer glücklich, selig zu preise' sin', wemmer Friede' wage'.

Nix wie hi(n) un dro(n) bleiwe. So fängt's Reich Gottes scho' jetzterd o.

Ame(n).

Un de Friede Gottes, der wu hecher is als alles, des mer denke' kenne', der soll eire Herze un Sinne in de Reih' halte' durch Jesus Christus, unsern Herr. Ame(n).S

